

ASO LUA, 14 TESEMA 2021

Na tauaofia le Fono Aoao Faitulafono i le itula e 9:24 i le taeao e tusa ai ma Polokalame o Fonotaga a le Palemene 2021/2022.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

TUSI FAAMAONIA O LE FILIFILIA

E tusa ai ma aiaiga o le Fuaiupu 59(2) o le Tulafono o Faiga Palota 2019, **Q A'u, TUIMALEALIIFANO VAALETOA SUALAUVI II**, O Le Ao o le Malo, ua tuuina atu ai nei le Tusi Faamaonia o le Filifilia o e ua taua suafa iinei ua filifilia e avea ma Sui Usufono o le Palemene o le Malo Tutoatasi o Samoa e amata mai i le aso 24 Novema 2021 ma suia ai le Tusi Faamaonia na sainia i lea lava aso.

FUIONO Tenina Crichton.

TUUINA ATU i lou nei Lima i Vaialele i lenei aso 30 o Novema 2021.

Sainia: Tuimalealiifano Vaaletoa Sualauvi II **O LE AO O LE MALO**

E tusa ai ma aiaiga o le Fuaiupu 84(2) o le Tulafono o Faiga Palota 2019, **Q A'u, TUIMALEALIIFANO VAALETOA SUALAUVI II**, O Le Ao o le Malo, ua tuuina atu ai nei le Tusi Faamaonia o le Filifilia o e ua taua suafa iinei ua filifilia e avea ma Sui Usufono o le Palemene o le Malo Tutoatasi o Samoa, e amata mai i le Aso Gafua 29 o Novema 2021 ma suia ai le Tusi Faamaonia na suia i le aso lava lea.

1. Maulolo Tavita Amosa.

2. Tagaloatele Pasi Poloa.
3. Aiono Tile Gafa.
4. Laumatiamanu Ringo M. Purcell.
5. Maiava Fuimaono Tito Asafo.
6. Faleomavaega Titimaea Tafua.

TUUINA ATU i lou nei Lima i Vaialele i lenei aso 30 o Novema 2021.

Sainia: Tuimalealiifano Vaaletoa Sualauvi II
O LE AO O LE MALO

FAATAUTOINA O SUI USUFONO FOU O LE PALEMENE

FOFOGA FETALAI: A o le i afifio mai sui usufono fou o le Palemene i luma o le Laulau mo le Tautoga, ou te valaau atu ina ia outou tutulai a o o’u faitauina le Tulafono Laitiiti o Amio Taualoa Faa-Palemene.

Na tutulai Sui Usufono o le Palemene a o faitauina e le Fofoga Fetalai Tulafono Laitiiti o Amio Taualoa Faa-Palemene.

Tulafono Laitiiti o Amio Taualoa Faa-Palemene:

FAAMATALAGA O FAAMOEMOEGA:

O le matafaioi patino a Sui Usufono uma o le Palemene o le tausisia lea o tulaga aupito i sili ona maualuga o uiga taualoa, e puipuia ma faatumauina ai le mamalu o le Palemene ma faia ai taumafaiga uma e faatumauina ai aiaiga autu o le Faavae. O aiaiga autu ua taua ua faamoemoe e tuuina atu ai ni taiala ma ni tulaga i Sui Usufono taitasi o le Palemene, e tatau ona faatino ai o latou tiute ma matafaioi i se tulaga toatasi po o i le aotelega.

O AIAIGA AUTU:

(1) **Faamaoni i le atunuu ma ona tagata:**

O sui usufono uma e tatau ona tausisia mataupu o le Tautoga o le Loto Faamaoni i taimi uma ma tausia le mamalu ma le aloaia o le Malo Tutoatasi o Samoa; ana faalapotopotoga ma ona tagata.

(2) **Faaaloalo i Tulafono:**

E tatau i sui usufono uma ona tausisia tulafono a Samoa ma puipuia aiaiga autu o lo o i totonu o le Faavae.

(3) Faaaloalo i Tagata uma:

E tatau i sui usufono uma ona faaaloalo i isi sui usufono, tagata lautele ma ofisa maufofi o le Malo faapea foi ma le galue i tulaga mamalu, faamaoni, o le le faaituau; aemaise le faia o le amiotonu i taimi uma.

(4) Faatinoga Lelei o Pule:

E tatau i sui usufono uma ona:

(a) faatulaga a latou mataupu totino;

(b) faaoga so o se faamatalaga ma faamatalaga uma na maua mai i o latou tofi faale-Malo; ma

(c) faatinoina o so o se malosi po o pule na maua mai i o latou Tofi faale-Malo, mo na o le lelei o tagata lautele ma pe a fai e tulai mai o so o se tulaga talafeagai ma se tulaga moni e feteenai ai aia, pe i tulaga tau tupe a le sui usufono lava ia, tupe faalettulafono po o se aia a le sui usufono e tatau ona manaomia e faasilasilaina atu ma le faia o so o se laasaga e aveese ai sea feteenaiga po o le le auai atu i lena feutagaiga tau pisinisi.

Manaoga Faapitoa mo Minisita ma Isi Tagata o lo o Umia Tofi faale-Malo:

O sui usufono uma o lo o umia tofi faa-palemene o so o se ituaiga ua manaomia e usitaia aloaia aiaiga autu e pei ona faamatalaina i luga ma e le tatau, i lalo o so o se tulaga ona faia o so o se faaiuga po o le tuuina atu o se malosi o so o se ituaiga, po o le a lava, e tusa ai i se mataupu o le a maua ai e le sui usufono so o se faaopoopoga i ana meatotino po o se faamanuiaga.

FAASALAGA:

O le solia o lena Tulafono Laitiiti o le a ono tagofia e le Komiti o Tulaga Aloaia ma Amio Taualoa po o e pei ona o le a fuafuaina e le Palemene.

FOFOGA FETALAI: Mo le faatinoina o le Tautoga, ou te valaau atu i Sui Usufono ina ia afifio muamua mai le isi toafa i le Laulau mo le faatinoina o la outou Tautoga, ona faamulimuli mai lea o isi Sui Usufono e toatolu.

Muamua mai le:-

1. Tofa FUIONO Tenina Crichton.
2. Afioga AIONO Tile Gafa.

3. Tofa FALEOMAVAEGA Titimaea Tafua; ma
4. Afioga MAIAVA FUIMAONO Tito Asafo.

TAUTOGA O LE LOTO FAAMAONI

“O A’U O..... ou te tauto i le Atua e ona le malosi uma lava o le a ou faamaoni ma tauaveina tonu le lotonuu faamaoni i le Malo Tutoatasi o Samoa, ma o le a ou faataunuuina ma le tatau ai ma le faamaoni ou tiute e avea ai o se Sui Usufono o le Palemene o Samoa. Ia fesoasoani mai le Atua ia te Au.

FOFOGA FETALAI: Ou te valaau atu i Sui Usufono fou e toatolu o lo o totoe, ina ia afifio mai i le Laulau mo le faatinoina o la outou Tautoga:-
Ia faitau le Tautoga ma ta’u lou Suafa.

5. Afioga LAUMATIAMANU Ringo M. Purcell.
6. Susuga MAULOLO Tavita Amosa; ma
7. Afioga TAGALOATELE Pasi Poloa.

“O A’U O..... ou te tauto i le Atua e ona le malosi uma lava o le a ou faamaoni ma tauaveina tonu le lotonuu faamaoni i le Malo Tutoatasi o Samoa, ma o le a ou faataunuuina ma le tatau ai ma le faamaoni ou tiute e avea ai o se Sui Usufono o le Palemene o Samoa. Ia fesoasoani mai le Atua ia te Au.

Na faaalua le agaga fiafia o le Maota i le patipati o latou aao i le maea ai o le Faatautoina o sui usufono fou.

MALELEGA MAI LE AO O LE MALO

TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliaga i le Fono Aoaofa Faitulafono na te iloiloaina ai Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe Faaopoopo (Nu.1) 2021/2022.

2. Tulafono Tau Faaofi o Teuteuga o le Tulafono o Lafoga o Tupe Maua 2021.

TUUINA ATU i lou nei Lima i lenei aso.....13..... o Tesema 2021.

Sainia: Tuimalealiifano Vaaletoa Sualauvi II

O LE AO O LE MALO

LAFO A LE KOMISI FAA-PALEMENE

FOFOGA FETALAI: Ou te tapa lau Afioga i le Sui Fofoga Fetalai o le Sui Taitaifono foi lea o le Komisi.

Afioga AUUAPAAU MULIPOLA ALOITAFUA MULIPOLA (Sui Taitaifono Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae): Lau Afioga i le Fofoga Fetalai, e tusa ai ma Tulafono Tumau 170(2)(a)(b)(c), ou te tolaulauina le Toe Faatulagaga o Sui Usufono o Komiti Faa-Palemene e pei ona fautuaina e le Komisi Faa-Palemene mo le faamaonia a le Fono Aoao.

1. **Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae** (*Standing Orders, Electoral, Petitions & Constitutional Offices Committee*).
 1. Tofa AUUAPAAU Mulipola Aloitafula Mulipola.
 2. Afioga VAELE Paiaaau Iona Paiaaau Sekuini.
 3. Afioga TEA Tooala Peato.
 4. Tofa MANULELEUA Paletasala T. Tovale.
 5. Afioga FUIONO Tenina Chrichton.
 6. Tofa Hon LAUOFO Fonotoe Nuafesili Pierre Laufofo.
 7. Tofa ALE Vena Ale.
 8. Afioga Hon LOAU Solamalemalo Keneti Sio.
 9. Susuga MAULOLO Tavita Amosa.
2. **Komiti o Tupe Maua ma Tupe Totogi** (*Finance and Expenditure Committee*).
 1. Afioga VAELE Paiaaau Iona Paiaaau Sekuini.
 2. Afioga MAGELE Sekati Fiaui.
 3. Afioga LAUMATIAMANU Ringo M. Purcell.
 4. Afioga MASINALUPE Makesi Masinalupe.

5. Afioga FALEOMAVAEGA Titimaea Tafua.
 6. Susuga Hon TUILAEPFA Fatialofa Auelua Dr. Sailele Malielegaoi.
 7. Afioga Hon TAPUNUU Niko Lee Hang.
 8. Tofa LEALAILEPULE Rimoni Aiafi.
 9. Afioga Hon SALA Fata Pinati.
3. **Komiti o le Vaega Tau le Tamaoaiga** (*Economic Sector Committee*).
1. Afioga NIUAVA Eti L. Malolo.
 2. Tofa LAGAAIA Tiatuau Tufuga.
 3. Afioga MAGELE Sekati Fiaui.
 4. Afioga MAIAVA FUIMAONO Tito Asafo.
 5. Afioga TAGALOATELE Pasi Poloa.
 6. Afioga FUAAVA Suluimalo Amata.
 7. Afioga Hon LAUTAFI Fio Selafi Purcell.
 8. Afioga ALAIASA Moefaaouo Malagaitutogiai Sepulona Moananu.
 9. Tofa Hon TUUU Anasii Leota.
4. **Komiti o le Vaega Tau le Va Fealoai** (*Social Sector Committee*).
1. Afioga LAUMATIAMANU Ringo M. Purcell.
 2. Afioga AGASEATA Valelio Tanuvasa Peto.
 3. Tofa FESOLAI Apulu Tusiupu Tuigamala.
 4. Tofa SEUAMULI Fasi Toma.
 5. Afioga NIUAVA Eti L. Malolo.
 6. Tofa MAUU Siaso Puepuemai.
 7. Tofa LENATAI Victor Faafoi Tamapua.
 8. Tofa Hon FAIMALOTOA Kika Iemaima Stowers-Ah Kau.
 9. Afioga AIONO Tile Gafa.
5. **Komiti o le Vaega o Atinae Eeseese** (*Infrastructure Sector Committee*).
1. Afioga FEPULEAI Faasavalu Faimata Sua.
 2. Afioga FALEOMAVAEGA Titimaea Tafua.
 3. Tofa FESOLAI Apulu Tusiupu Tuigamala.
 4. Afioga MASINALUPE Makesi Masinalupe.
 5. Afioga TAGALOATELE Pasi Poloa.
 6. Afioga SULAMANAIA Fetaiai Tauilili Tuivasa.
 7. Afioga LEAANA Ronnie Posini.
 8. Afioga LUPEMATASILA Galumalemana Tologata Togia Tile Leia.
 9. Afioga PESETA Vaifou Tevagaena.

Ma lou faaaloalo lava lau Afioga i le Fofoga Fetalai.

ISI FAASILASILAGA A LE FOFOGA FETALAI

FOFOGA FETALAI: Atonu o se laolao taua foi lenei e tau ina ou faatulima ma faafeiloai atu ai i le paia o le Maota. i le afio o lau Afioga i le Tamaitai Palemia, lau Afioga i le Sui Palemia, le paia i le Kapeneta, tainane le afifio o Afioga i Minisita Lagolago.

Ua mamalu foi lea talaga, i le afio o lau Afioga i le Taitai o le Itu Agai, le Sui Taitai ma le mamalu o sui usufono o le Palemene o le atunuu.

Taeao manuia, malo le lagi e mama. Faafetai i le Atua o lo o maualuga pea lo outou soifua manuia ma le lagi e mama. Ia agalelei le Atua i le usugafono i lenei taeao.

Le paia i sui usufono fou e pei ona faatauto i lenei taeao, e leai se manuia o i le Nofoa. O le tatalo, ia to mai le lagi manu mo lo outou valaauina. Ua na o i tatou o ni meafaigaluega ua faaoga e le Atua mo so na Viiga e ala i tofiga ua filifilia ai i tatou. Ia tatou faamoemoe mea uma i le Atua e maua ai lo tatou fesoasoani. Ia manuia tele lo outou tulai mai e tauave Nofoa o outou Itumalo i lenei Paeaiga i upufai o Malo.

E faafeiloai atu foi i le paia o le atunuu ua potopoto i le Maota Fono nei, malo le soifua manuia, malo le lagi e mama.

Le faafofoga tapuai mai a Samoa i ona tulaga faalupe, ia tapuai maia ma le manuia.

Mo le silafia e le Maota, ua nofoia nei se vaega o le Nofoaga mo Tagata Lautele, e sui auai o le Polokalame Faa-Palemene mo Talavou.

O se vaega o polokalame ua leva ona faatino e le Ofisa o le Failautusi, e faailoa atu ai matafaioi ma galuega fai a le Palemene i le atunuu.

E fai lo' u leo ma sui o lenei Palemene e faafeiloai atu ai i lo outou mamalu. Ia sagai ane ai o le tai ma ia i ai faamanuiaga a le Atua i lo outou alofaiva i la outou polokalame, ua fuafuaina mo aso e lua.

TUUINA ATU O PEPA

Na tolaulauina e le Sui Failautusi i le Fono Aoao le faasologa o Pepa e tusa ai ma T.T.49(2).

1. P.P.2021/2022, Nu.11, Lipoti Faaletausaga a le Falemeli o Samoa mo le tausaga faaletupe 2020/2021.
2. P.P.2021/2022 Nu.12, Lipoti Faaletausaga a le Penisione a le Palemene mo le tausaga faaletupe 2020/2021.
3. P.P.2021/2022 Nu.13, Lipoti Faaletausaga a le Faalapotopotoga Faavae Tau Fatugao a Samoa, mo le tausaga faaletupe faaiuina aso 30 Iuni 2021.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2021/2022 – faitauga muamua**

FOFOGA FETALAI: Tulai mai lau Afioga i le Minisita o Tupe.

Afioga Hon MULIPOLA ANAROSA ALE MOLIOO (Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2021/2022 i lona faitauga muamua.*

Faaluaina e le Minisita mo Faatoaga ma Faigafaiva, Minisita mo Galuega, Felauaiga ma Atinae Eseeese ma le Minisita o Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu.1) 2021/2022 i lona faitauga muamua.

**TALA FAATATAU O TUPE FAAOPOOPO (NU.1) 2021/2022
– faataatia i luga o le Laulau a Fono**

FOFOGA FETALAI: Tulai mai lau Afioga i le Minisita o Tupe.

Na faataatia i luga o le Laulau a Fono e le Afioga i le Minisita o Tupe, Hon Mulipola Anarosa Ale Molioo le Tala Faatatau o Tupe Faaopoopo (Nu.1) 2021/2022 e tusa ai ma Tulafono Tumau.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2021/2022 – lafo mo le faitauga faalua**

FOFOGA FETALAI: Tulai mai lau Afioga i le Minisita o Tupe.

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2021/2022 i lona faitauga faalua.*

Faaluaina e le Minisita mo Faatoaga ma Faigafaiva, Minisita mo Galuega, Felauaiga ma Atinae Eseeese ma le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu.1) 2021/2022 i lona faitauga faalua.

**SAUNOAGA O LE TALA FAATATAU FAAOPOOPO MUAMUA O
LE TUPE 2021/2022**

Lau Afioga i le Fofoga Fetalai ma Sui Usufono mamalu o le Palemene,

Avea ia lenei avanoa ou te fa'afeiloai atu ma fa'atalofa atu ai i lau Afioga i le Fofoga Fetalai o le Fono Aoao Faitulafono a Samoa.

Ou te fa'atalofa atu foi i le Afioga i le Tamaitai Palemia o Samoa, le Afioga i le Sui Palemia ma le mamalu o Minisita o le Kapeneta ma Minisita Lagolago.

E faafeiloai atu ma fa'atalofa atu i le Taitai o le Itu Agai, o le Sui Taitai ma la outou Vaega Faaupufai faapea Sui usufono uma o le Palemene o Samoa.

Le tapuaiga mamalu a le Afioga i le Ao Mamalu o le Malo ma lau Masiofo aemaise o le Afioga i le Sui o le Fono a Sui Tofia.

Le tapuaiga a le Afioga o le Faamasino Sili ma le mamalu o le Faamasinoga.

Ou te fa'apa'i atu foi i le faafofoga tapuai mai o si o tatou atunuu Samoa aoao i ou mamalu faaletalalelei, mamalu faaleatunuu ma ou mamalu faalemalo. Tulouna ia.

E le faagaloina foi le tapuaiga a o tatou aiga i le Motu i Sasae aua Tutuila ma Manua.

Tainane le tapuai mamao mai i le paia ma le mamalu o Samoa o lo o alaala ma papaaa o atunuu e mamao. Po o fea lava le tafa o le lalolagi o lo o e tapuai mai ai ma tautua si o tatou atunuu ma le Malo.

E ofo alofa ma ou faatalofa atu.

Ia mālīe i lo'u gutu upu o lau Tulafono. Aua e tupu olaola le tagata amiotonu. Pe ou te savali foi i le mailei a lē faimanu, ou te malu lava i le paulo o lou ofutele.

Ua tō-ao le fale o le tautai i Vasa

Ua lalama le valaau o le a fa'aa'e

Ae mata'i e le taliuta ataata o galu fati ma galu pu'e

Ae se'i tōfaō le fa'atamasoaliiga i aao o le tauola

Ua agai ina tafamū tafailagi o Si'uolefanua

O le a faaifo i mauga le galuega a le Alii seu

Ua faalava foi le Too ole Tula

Ae tali mālīe le tapuaiga a fuesina

O lo o tatou fa'atalitali atu i le aso na valoia e le Evagelia o Ioane 1:1

Sa i le Atua le upu. O le Atua foi le upu.

Ma o lo o tatou faatali ai i le aso e liutino ai le upu. O ia o le Tupu, O le Alii, O le Fa'aa'o o Malo uma, O le Faipule, O le Atua malosi ma le Alii o le Filemu.

Lau Afioga i le Fofoga Fetalai,

O le mau tuufaasolo a Samoa pe a tapena le faasoaina o lona tamaoaiga anamua.

E tapena uma le uluai seleselega o mea lelei ua ia maua i ona lima.

Pe mai le vao. Pe mai le sami. Po o manu felelei foi o le lagi.

Ona faapea lea o le tala a le Matai i lona 'au aiga.

Ia auau uma mai maa ma mea ua maua.

O le mea sili ua tatou faasoa feiloai

Faasoa fesilafa'i ma faasoa fealolofaa'i

Pe lava. Pe le a'u. O lea ua tatou matitiva fesaga'i

O a mea ua maua.

Viia le Atua i lana foai mo Samoa i lenei taimi.

Lau Afioga i le Fofoga Fetalai ma Sui Usufono mamalu o le Palemene,

Ou te tulai atu ma le agaga faaaloalo, e tuuina atu i luma o le Laulau a Fono a le Palemene le Tala Faatatau Faaopo'opo Muamua o le Tupe mo le Tausaga Faaletupe 2021/2022 o lo'o faagasolo nei.

Lau Afioga i le Fofoga Fetalai,

Ua tatou oo mai nei i le afa tausaga o lenei tausaga faaletupe. O le tausaga faaletupe muamua foi lenei o le faigamalo a le Faatuatua i le Atua Samoa ua Tasi. Ua tatou molimauina o se tausaga faaletupe lenei ua pito sili ona faigata mo si o tatou atunu'u ona o vaega nei:

- (i). O loo sosolo faaafi pea le faamai ole Koviti-19 i atunuu o le lalolagi, ona o lea mafuaaga ua savali nei le 21 masina talu ona tapunia femalagaiga faava-o-malo ma le malaga mai o tagata tafafao, ma o se tulaga ua aafia tele ai alamanuia masani sa faalagolago tele i ai le Vaega o Tagata tafafao mai atunuu i fafo.
- (ii) O le tausaga foi lenei ua faatino ai le fesuiaiga o le faigamalo ina ua maea lana faiga palota ia Aperila 2021. E tele ma anoanoai luitau o lenei faigamalaga. Ae talitonu o lo o tapasa pea le tatou folauga e le Tama i le Lagi. O lo o malu puipua pea si o tatou atunuu mai le oo mai o le faamai o le Koviti-19. Ae le gata i lea, o lo o sosolo pea le folauga a le tatou Malo i le Faavae Autu o le Tala Autu ole Tupe 2021/22 lea sa pasiaina ia Setema 2021.

Lau Afioga i le Fofoga Fetalai,

I le masina o Setema 2021, na tu'uina atu ai i le laulauafono a le Palemene le Tala Fa'atautu Autu o Tupe a le Malo mo le tausaga 2021/2022 ma ou te

fiafia e fa'ailoa atu, o lo'o fa'agasolo lelei pea le fa'atinoina o polokalame ma galuega e pei ona pasia e le Palemene. E fiafia e faailoa atu, i totonu o le fa (4) masina talu ona pasia le Tala o le Tupe Autu, ua amata ona fa'atino polokalame fesoasoani mo vaega o lo o aafia ona o le pa'u o lo o i ai le tamaoaiga ona o tapu mo le faamai ole Koviti-19. E le o malolo lau Faigamalo talu ona se'e atu i le foe ma e viia ai pea lo tatou Tama i le Lagi ona o ana faamanuiaga ia Samoa e oo mai lava i lenei aso.

Lau Afioga i le Fofoga Fetalai,

O lenei Tala Fa'ataua Fa'aopopo Muamua o le Tupe, o lo'o taumafai lava e fetu'una'i ma toe fa'asoa nisi o vaegatupe faaagaga a le Malo aua le fa'atinoina o nisi o atina'e taua.

Lau Afioga i le Fofoga Fetalai,

Ou te fiafia e fa'ailoa atu, e ui i talosaga faaopopo o le a folasia atu, o lo'o i ai le fa'amoemoe o le a tu'uitiitia le fa'asiliga o Tupe Alu a le Malo nai lo ana Tupe Maua i lalo o lenei Tala Fa'ataua Fa'aopopo Muamua o le Tupe mai i le 2.5% i le 2.4% o le tamaoaiga.

O lenei aotelega, o lo'o atagia ai le naunauta'iga a le faigamalo ina ia iloilo ma toe fetu'una'i nisi o vaegatupe ua faamautuina e mafai ona faaopopo pe faaitiitia mo le faatupeina o nisi o atinae o loo fuafuaina le faatinoina e tusa ai ma fuafuaga ma le faamuamua a le Malo.

Tala Faatatau Faaopopo Muamua o le Tupe:

Lau Afioga i le Fofoga Fetalai,

O se ootoga lenei o vaega autu o lenei Tala Faatatau Faaopopo Muamua o le Tupe mo le tausaga faaletupe 2021/2022.

O le aotelega o tupe alu faaopopo e tusa ma le **\$21,854,071** ma e fa'atupeina mai le \$19,472,807 o Tupe Faameaalofa mai Fafu ma le \$4,671,359 o vaegatupe toe fetu'unai mai Tupe Alu faaagaga a Matagaluega talafeagai.

O nisi nei o Matagaluega ua toe fetu'unai a latou Tupe Alu:

1. Matagaluega o Fa'ato'aga ma Faiga Faiva – (\$320,000)

O nei vaegatupe ua mafai ona fa'asaoina mai ina ua toe iloilo le fa'atinoga o le Fa'aaliga o Fa'ato'aga mo lenei tausaga fa'aletupe lea ua se'e atu ai e lagolago ma toe una'ia talomua i nu'u ta'itasi.

2. Matagaluega o Tupe – (\$4,200,000)

O nisi nei o sao a le Malo i nisi o ana atina'e tetele ua mafai ona toe fetu'una'i e tusa ai ma fa'atalatalanoaga ma pa'aga masani a le Malo mai fafo ma o

lo'o fa'atupeina mai i lalo o le Tala i le Tupe a le Matagaluega o Tupe e pei ona masani ai:

- **Nofoaga mo Tane Suauu (\$200,000)**
O lenei atina'e fa'atupeina e le Fa'alapotopotoga o Atunu'u o lo'o gaosi ai le Suauu (OPEC) ma o lo'o fa'atalanoaina ile taimi nei le lē toe fa'aaauina. A o faia nei tulaga ua tu'uitiitia le sao a le Malo e talia ai le taunu'uga o fa'atalatalanoaga mo le isi vaega o lenei atina'e;
- **Poloketi mo le Fa'aleleia o Feso'ota'iga - (\$550,000)**
O le sao o le Malo mo lenei poloketi ua tu'uitiitia e fua lea i luga o galuega o lo'o fuafuaina mo masina o lo'o totoe o lenei tausaga fa'aletupe;
- **Tupe fa'aagaga mo Tiute i luga o Poloketi - \$1.500,000 a le Malo**
Tupe fa'aagaga mo Lafoga i luga o - \$1.600,000 Poloketi a le Malo
O nei tupe fa'aagaga e fua i luga o le fa'ata'atiaga o galuega fa'atino fuafuaina ma ua iloilo nei ma toe fetu'una'i ma tu'uitiitia ai vaegatupe e ono mo'omia mo nei tupe alu;
- **Poloketi a le ADB mo le fa'aleleia o le Auala - \$350,000**
Ua fetu'una'i lenei atina'e e fua i luga o galuega e mafai ona fa'atino i totonu o le tausaga fa'aletupe nei ma ua tu'uitiitia nei e tusa ai ma polokalame o galuega ua fa'ata'oto nei mo masina o lo'o totoe;

**3. Matagaluega o Puna'oa Fa'alenua (\$71,359)
ma le Siosiomaga.**

O nei vaegatupe e mo auaunaga lautele e lagolagoina ai vaega ta'itasi a le Matagaluega ma ua tu'uitiitia ma toe fetu'una'i ina ia mafai ona fa'ase'e atu i le Vaega o lo'o tautuaina ai le Ofisa a le Afioga ile Minisita e pei ona masani ai;

4. Ofisa o le Fono Aoaofaitulafono - (\$80,000)

O nei vaegatupe ua mafai ona fa'asaoina mai i galuega a le Ofisa o le Fono mo Polokalame fa'alea'oa'oga ma ua fa'ase'e mai e toe fetu'una'i aua nisi o galuega o lo'o ave i ai le fa'amuamua.

Lau Afioga i le Fofoga Fetalai, o le a ou ootoina atu loa Tupe Alu Faaopoopo e **\$21,854,071 tala** ma e aofia ai vaega nei:

1) Tupe Alu Faatulafono \$1.601,587

O nei vaegatupe e toe fa'aola ai tupe faaagaga mo totogi o sui mamalu uma o le Palemene Lona XVII lea sa fa'aaoga e fa'atupe ai le totogiina o sui

mamalu uma amata mai i le masina o Aperila ma Me o le tausaga fa'aletupe ua mavae;

2) Matagaluega o Fa'ato'aga ma Faiga Faiva \$320,000

O lenei aofa'iga o le a fa'atupeina ai ni atina'e ma polokalame fa'atāuaina a le Matagaluega e aofia ai:

- **\$120,000 mo le Poloketi mo le Atina'e o Fa'atao'aga Laiti**
O nei vaegatupe e faamoemoe o le a fausia ai se fale gaosi meaa manu (feedmill), faalelei ai le fale e nonofo ai le afaigaluega fa'atasi ai ma le fale e teu ai meafaigaluega. E faamoemoe a lava le seleni e fa'apipi'i ai ma se masini e fa'asoaina le eletise (transformer).
- **\$200,000 Fale Teu Oloa**
O lo'o iai le fuafuaga a le Matagaluega e toe fa'alelei atoa ma fa'atotoga lelei le fale teu oloa i Salelologa (pack house) aua le mamalu o le au faifaatoaga i Salafai. O lenei fale e mafai ona tapena ma teu lelei ai uma fua o fa'a'ele'eleaga mo le auina atu i atunu'u i fafo.

3) Matagaluega o Pisinisi ma Alamanuia SAT\$20,000

O loo faagasolo le toe iloiloaina e le Malo o le faamatuuina atu o nei fesoasoani mo Asosi. Ae mo le taimi nei, o nisi nei o vaega o le a tuuina atu iai le fesoasoani a le Malo aua le atinaeina o tagata faigaluega e aofia ai – Samoa Workers' Congress, Samoa Nurses Association, Samoa Seafarers and Maritime Association ma le Public Service Association.

4) Matagaluega o Tupe SAT\$4,339,713

- **\$7,918 mo le Fetu'una'iga o Totogi o nisi o le Afaigaluega**
E tusa ai ma le fa'amaoniga a le PSC e iai nisi avanoa faigaluega ofisa a le Matagaluega ua fetu'una'i nei totogi ina ia o gatasi ma tiute ma galuega o lo'o fa'atinoina i le taimi nei.
- **\$830,402 Lisi mo le Fale o lo'o Fa'aaogaina mo le Faatauina o Oloa tau Fa'ato'aga i Otahuhu i Niu Sila**
O nei vaegatupe e totogiina ai le vaegatupe a le Fa'alapotopotoga o Fa'alavelave Tutupu Fa'afuase'i (po'o le ACC) mo le fa'atauina o le fanua i Otahuhu i Niu Sila lea o lo'o fa'atinoina le fa'atauina mo fua o fa'aeleeleaga auina atu mai Samoa. O le toe totogiina atu o le ACC o lo'o fa'atinoina fa'alisi ma o lo'o togitogi ta'i masina. O nei vaegatupe o lo'o aofia ai masina o le tausaga fa'aletupe ua tuana'i i totonu o nei vaegatupe e tusa ai ma le maliega na sainia ma le ACC.

- ***\$150,000 Polokalame mo le Atinaeina o Faalapotopotoga ma Nu'u (CSSP)***
\$3,149,239 Polokalame mo le Atina'e o Uafu
\$150,000 Polokalame Fesoasoani a le ADB aua le faamalosia o Tui Puipui
O nei vaegatupe o le sao a le Malo i poloketi nei e tusa ai ma taunu'uga o fa'atalatalanoaga sa fa'atinoina ma pa'aga masani a le Malo.
- ***\$52,154 Maintenance Fees for Commonwealth Secretariat Debt Management***
O lenei vaegatupe o se tupe totogi fuapauina i luga o polokalame o lo'o fesoasoani ai ile mataituina o nonogatupe ma aitalafu a le Malo.

5) Matagaluega o le Va-i-Fafo ma Fefa'ataua'iga - \$516,129

- ***\$320,000 mo Ta'avale mo Malo fa'aaloogia¹***
O nei ta'avale sa fa'amoemoe e fa'atupeina mai i le Tala Faatatau Faaopopo Lona Lua o le Tupe 2020/21, ae peita'i talu ai le tuai ono tauaofia le fonotaga a le Palemene, na faapafala ai loa le Tala Faaopopo Lona Lua ae tapena lelei na o le Tala Faatatau Autu 2021/22. O nei taavale e faamoemoe e teumalu ma vaavaai lelei e le Matagaluega aua ni taligamalo a le Malo o Samoa mo malo faaaloogia mai isi atunu'u e aofia ai ta'ita'i o Malo ma fa'auluuluga o Fa'alapotopotoga eseese a le lalolagi.
- ***\$13,879 Avanoa faigaluega mo se Kalaka a le Loia a le Matagaluega***
O nei vaegatupe e aofia ai le totogi mo na o masina o lo'o toote i le tausaga fa'aletupe o lo'o fa'agasolo nei;
- ***\$182,250 mo le Failautusi Muamua i le Ofisa a le Malo o Samoa i Canberra Ausetalia***
E fa'amoemoe o se aso lata mai o le a amata tapena ai le ua tofia i lenei avanoa ma o vaegatupe ua fa'atautuina o le a fesoasoani i le fa'amautuina o le sui o Samoa ma lona aiga ile Ofisa o le Malo i Canberra Ausetalia.

¹ O lenei aofa'iga e aofia ai ma lafoga. O le aofa'iga e \$278,261 o lo'o auina atu i le Pepa Fa'apipi'i o le Tulafono Taufaa'ofii e le o aofia ai lafoga.

6) Matagaluega o Punaoa Fa'anatura ma le Siosiomaga \$493,719

O nei vaegatupe o le a toe fa'avaeina ai le Ofisa mo le Afioaga i le Minisita lea sa i lalo o le va'ava'aiga a le Afioaga i le Palemia ma o lo'o aofia ai totogi a le aufaigaluega, galuega fa'atino ma le fa'atauina o aseta e mo'omia aua le fa'atinoina o galuega a le aufaigaluega a le Minisita.

7) Matagaluega a Leoleo ma Fale Puipui \$480,410

O nei vaegatupe e fa'amoemoe o le a fausiaina ai se pa e si'o ma malu ai le fanua o lo'o fuafuaina mo le Ofisa tutotonu a le Matagaluega i Salelologa.

8) Matagaluega o Galuega, Fela'ua'iga ma Atina'e \$4,100,000 Tetele

• ***\$100,000 Galuega e Avea ai ma Sui ole Malo: Street Addressing***

O lenei poloketi mo le fa'aigoaina o auala ma le fa'anumeraina o maota ile atunu'u lo'o fa'agasolo pea ma e aofia ai ni tagata faigaluega ma ni masini fa'apitoa e fa'atino ai galuega a le Matagaluega;

• ***\$2,000,000 Galuega Faatino Tuuina Atu i isi Vaega poo le Community Service Obligation (CSO): Pulega o le Suavai***

O nei vaegatupe e tu'uina atu i le Pulega ole Suavai e fesoasoani ai i le fa'atinoina o nisi o galuega faaopopo mo le taiina ole suavai mo nisi o nu'u ma alalafaga i tua e le mafai e le Pulega ona faatupeina atoa ma e manaomia ai le fesoasoani a le Malo;

• ***\$2,000,000 Galuega Faatino Tuuina Atu i isi Vaega poo le CSO: Pulega o Malosi'aga Tau Eletise***

O lenei vaegatupe o le a tu'uina atu e fesoasoani ai i nisi o atina'e fuafuaina a le Pulega o Malosiaga Tau Eletise ina ia fa'aoo atu le eletise i nisi o nuu ma afioaga e le mafai ona faatupeina atoa e le Pulega ma e manaomia ai pea le fesoasoani a le Malo;

9) Ofisa o le Failautusi o le Fono Aoao Faitulafono SAT\$80,000

O nei talosaga o lo'o mafai ona fa'atupeina atoa ile toe fetu'una'iga o vaegatupe faaagaga mai Galuega, e Avea ai ma Sui o le Malo a le Ofisa o le Fono mo Polokalame Faa-Palemene (Aoaoga ma Sootaga ma Tagata Lautele).

• ***\$35,000 Galuega Fa'atino: Auaunaga i le Ofisa o le Failautusi o le Fono***

O nei vaegatupe e faatupe ai galuega faatino aua fonotaga a le Palemene o loo totoe mo le tausaga faaletupe nei. O nei tupe fa'atatauina i tausaga ta'itasi e fua lava i luga o le umi o fonotaga a le Palemene fa'atasi ai ma tulaga e ono mo'omia ma e fesuisuia'i lava i tausaga ta'itasi;

- ***\$45,000 Galuega Fa'atino: Auaunaga a le Ofisa o le Maota ma Taulumaga***

O nei vaegatupe e toe faaola ai vaegatupe sa faaaogaina e faaatoa ai le tau o le taavale mo le Taitai o le Itu Agai e tusa ai ma le finagalo a le Kapeneta i luga o lenei lava mataupu.

Poloketi e faatupe i Tupe Faameaalofa mai Paaga e \$9,902,513 mo vaega nei;

- 1) Atina'e mo nu'u, agafesootai ma faigapaaga ma faalapotopotoga i tua atu o le Malo:
 - Polokalame i Nu'u ma Alalafaga mo le Taofia o Sauaga i Totonu o Aiga - \$50,770;
- 2) Vaega Maoti o Fa'ato'aga ma Faiga Faiva:
 - Polokalame mo le Malu Puipua o Itu'aiga Niu o lo'o Fa'avaeina ile Lisi o La'au Puipua a le Pasefika - \$26,099
 - Polokalame mo le Puipua ma le Toe Totōina o Niu aua le Soifua Manuia i totonu o le Pasefika - \$46,523
 - Polokalame mo le Siitia o Tupe Fa'afaigaluegaina aua le Atina'eina o le Niu – SAT\$18,438
- 3) Vaega Maoti mo Pisinisi, Alamanuia ma Fefa'ataua'iga:
 - Fesoasoani mo se Su'esu'ega i luga o le Fa'afaigaluegaina o le Fanau laiti - \$101,541
- 4) Vaega Maoti o le Siosiomaga
 - Tu'ufa'atasia o le Lipoti Lona 4 i luga o le Malu Puipua o nisi o Puna'oa Faanatura o le Atunu'u - \$88,848
- 5) Vaega Maoti o Tupe;
 - Fesoasoani e tali atu ai i a'afiaga o le Faama'i o le Koviti 19 - \$9,570,294

Upu Faaiu:

Lau Afioga i le Fofoga Fetalai ma le Mamalu o le Fono,

O loo galulue pea le tatou aufaigaluega ma le Malo ina ia faamuamua pea puipuiga ole Koviti-19. E momoli atu ai lava le faamalo ia i latou uma o loo gafa pea ma le faatinoina o lea pitolaau aemaise o le tatou aufaigaluega a le Soifua Maloloina, Leoleo, Ofisa o Faalavelave Tutupu Faafuasei (NEOC) ma isi. E avea foi lenei avanoa taua e tatalo atu ai ile mamalu ole tatou atunuu ina ia fai tui puipuia e lua (2) ma usitaia lapataiga ma puipuiga o loo faalauiloa atu e le tatou ofisa ole NEOC ma le Soifua Maloloina aua lava le puipuiga ole mamalu o le tatou atunuu mai le pipisi ole faamai ole Koviti-19.

O loo sosolo pea le folauga a le faigamalo i le fa'avaa tau tupe sa fausiaina ai le Tala ole Tupe Autu 2021/22. O le manatu maualuga ia nofo fealofani, saogalemu ma ola saoloto tagata uma aemaise o le fuafuaga ina ia atinae nuu ma afioaga, ae le gata i lea ia faasoasoa tatau le tamaoiga ole tatou Malo aua le soifua manuia o tagatanuu o Samoa e amata atu nei, taeao ma le lumanai.

Lau Afioga i le Fofoga Fetalai, faapea Sui Usufono o le Palemene,

Avea a'u e fai ma Sui o le Malo, e momoli atu ai moomooga alofa ma faamanuiaga i lau Afioga i le Fofoga Fetalai, le mamalu o le Palemene nei aemaise le tapua'iga a Samoa. Ia folau pea Samoa i le vaa o manū. Fulifaō le vaa o mala. Tatou to'ai taunuu ma faafeiloai atu le Kerisimasi fiafia ma se Tausaga fou manuia. Soifua

Na faaalua le agaga fiafia o le Maota i le patipati o latou aao i le maea ai o le Saunoaga a le Minisita o Tupe i le Tala Faatatau Faaopoopo o le Tupe (Nu.1) 2021/2022.

FOFOGA FETALAI: Malo faafetai i lau Afioga i le Minisita o Tupe mo le folasaga malamalama i luma o le Palemene.

E tusa ai ma le Tulafono Tumau 133, o le a tolopo felafolafoaiga i le Tulafono Tau Faaofi o le Faatatauina o Tupe Faaopoopo (Nu.1) 2021/2022 e le itiiti ifo i le 14 aso, a o tuuina atu le Tala Faatatau o Tupe Faaopoopo (Nu.1) 2021/2022 mo le iloiloga a le Komiti o Tupe Maua ma Tupe Totogi ma toe lipoti mai i le Fono Aoao i le fonotaga o lumanai.

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA 2021 – faitauga muamua**

FOFOGA FETALAI: Tulai mai le Afioga i le Minisita o Tiute ma Tupe Maua.

Afioga Hon TUALA TEVAGA IOSEFO PONIFASIO (Minisita mo Tiute ma Tupe Maua): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2021 i lona faitauga muamua.*

Faaluaina e le Minisita mo Faatoaga ma Faigafaiva, Minisita mo Galuega, Felauaiga ma Atinae Eseese ma le Minisita mo Pisinisi, Alamanuia ma Leipa.

Na faamaonia le lafo ma faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2021 i lona faitauga muamua.

Na faamaonia le lafo ma faitauina le Tulafono Tau Faaofi o Teuteuga o le Tulafono o Lafoga o Tupe Maua 2021 i lona faitauga muamua.

FOFOGA FETALAI: Ia, o lea ua tatou taunuu mai i le siui o a tatou taualumaga e tusa o galuega sa faatulaga mo lenei aso, ae o le avanoa lenei ou te tapa ai ma le faaaloalo lau Afioga i le Tamaitai Palemia mo lau saunoaga.

Susuga Hon Tuilaepa Fatialofa Auelua Dr. Sailele Malielegaoi (Taitai o le Itu Agai): Lau Afioga i le Fofoga Fetalai, ou te tulai atu lava e i ai si tamai mataupu lea ou te fia talanoa ai, pe le o le avanoa lenei pe se i maea le saunoaga a le Tamaitai Palemia? Si tamai mataupu lava ou te fia laga.

FOFOGA FETALAI: Ia, talu ai o lo o i ai galuega mo lenei aso, ou te faamalulu atu ai i lau Afioga i le Taitai o le Itu Agai, afai o se mataupu e pei o Tulafono o lo o i luma nei o le Palemene, o lo o i ai le tatou avanoa i le toe tolopoina mo le isi a tatou fonotaga.

Susuga Hon Tuilaepa Fatialofa Auelua Dr. Sailele Malielegaoi (Taitai o le Itu Agai): Leai, o le mataupu ou te tulai atu ai, e fia fai sina au upu faamalo i sui usufono ia na faatauto nei.

FOFOGA FETALAI: Ia, se i maea le saunoaga a le Palemia ona tuuina atu lea o lou avanoa.

Lau Afioga i le Tamaitai Palemia.

SAUNOAGA A LE PALEMIA

Afioga Hon FIAME NAOMI MATAAFA (Palemia): Ia, lau Afioga i le Fofoga Fetalai, sui usufono mamalu o le Palemene, ua tatou faatasi foi ma le tapuaiga a Samoa i ona tulaga faalupe i totonu o le Maota Fono.

E matauina o le tapuaiga a Aiga i itu tetele o sui usufono fou o le Maota sa faatautoina i le aso, aemaise le tapuaiga a tama ma tina faaleagaga.

O lo o tatou faatasi foi ma le vasega o Talavou o se polokalame mo le Palemene ma le faalauiloa.

Ia, o tulaga masani foi o le tapuaiga a le aufaigaluega a le Malo o lo o tua i ai le faigamalo i le faatinoina o tiute ma feau.

E momoli atu le faamalo ma le faafetai i lau Afioga i le Fofoga Fetalai ona o lea ua matau ua maea galuega o le aso. Ma ou te manatu o le tauaofiaga mulimuli foi lea o le Palemene mo lenei tausaga. Ma e maua ai le avanoa e muai piiama ai i tapuaiga ma talosaga, e amata mai i le vaveao i le sauniga o le fonu tatalo a le Palemene, ia, e faapea foi le talosaga na saunia e lau Afioga i le tauaofiaga o lenei taeao i le alofa ma le agalelei o le Atua mo lenei Palemene aemaise le atunuu pele o Samoa.

E faamalo i lau Afioga faapea le Matagaluega e tusa ai ma le tapenaina o tatou galuega faagasolo o le auaunaga mo le Palemene o Samoa. O lea foi ua mafai ona faatino se tasi o sauniga taua o le faatautoina o nisi o sui usufono fou, i le maea atu o Faiga Palota Laiti. Ae ao foi ona toe faagasolo i tua se vaai i le tauaofiaga amata o lenei Paeaiga XVII, i le masina o Setema ma le galuega sa faatino o le Tala Autu o le Tupe, aua o lena lava e pei foi ona faaopoopoina i le tala faaopoopo i lenei taeao, o le tamaoaiga lava e tua i ai le Malo i lana faasoa ma le faatinoga o ana galuega. Ma e le itiiti le agaga faafetai i lau Afioga i le Fofoga Fetalai i le faatautaiga o mataupu ma galuega a le Palemene.

Ou te fia fai se upu faapitoa e faafetaia ai le tapenaga o le Fono Tatalo muamua o le Paeaiga leni e pei ona sa tatou auai i ai i lenei taeao fou. Ma ou te manatu o se taiala taua foi lea i le feau folafola o leni taeao, ma le feau o lea o lo o faapea mai, “Atiaeina o le tino, faaauau le galuega.” Ou te manatu lau Afioga i le Fofoga Fetalai ma le mamalu o le Palemene ma i tatou uma ua potu i leni taeao, ua lava taoso ai leni Palemene i le feau mo lona valaauina aua upufai ma pulega faale-Malo, le tatou faaauuina i nei o tatou tupulaga ia aemaise le Paeaiga XVII o le Palemene, le tatou tauaveina o le Faigamalo Tutoatasi o Samoa, na faavae e o outou tuua ma o tatou matua.

E fia fai se upu faapitoa e piiama foi i le saunoaga a lau afioga e faafeiloai atu ai i afioga i sui usufono mamalu sa faatautoina i leni taeao, le Tofa ia Fuiono, le Tofa ia Maulolo, le Afioga ia Tagaloatele, le Susuga ia Aiono, le Afioga ia Laumatiamanu, lau Afioga Maiava Fuimaono, faapea lau Tofa Faleomavaega.

E faatalofa atu, faafetai i le alofa o le Atua ua tau lau o le faamoemoe, ma ua faaopoopo mai ai pou o le Maota o Samoa, sa o tatou talitalia. Malo le

tau, malo le finau, ma e tauala atu foi i a outou afioga le faamalo i o outou itumalo i le faatinoina o le tiute, o le faia lea o le filifiliga mo sui o le Palemene o Samoa.

Sagai ane ia ai o le tai, ia manuia lo outou tulai mai. Ia faatamaoigaina le tofa ma le uta e le Atua aua so outou sao mo upufai o Samoa.

Ou te manatu lau Afioga i le Fofoga Fetalai, ua faataoto nisi o galuega e faaauau ai la tatou polokalame o galuega mo le Palemene. E pei ona saunoa i ai le Minisita o Tupe ma ua faapena ona faagasolo atu i le Komiti. O lea foi ua faataatia i lona faitauga muamua le Tulafono, o Teuteuga o Lafoga. Ma ou e manatu lau Afioga i le Fofoga Fetalai, ia momoli atu ia i lenei Maota le Palemene Lona XVII lona tausaga fou i le lagi e mama ma le soifua lelei.

Ae avea ia lenei avanoa e faaiu atu ai sa matou faamatalaga, e momoli atu ai ia moomooga alofa ma faamanuiaga, aua se Kerisimasi filemu ma le fiafia, aemaise o se Tausaga fou manuia.

Ia manuia lau afioga ma le Maota, manuia le tapuaiga ua tatou faatasi i lenei aso, soifua.

Na faaalua le agaga fiafia o le Maota i le patipati o latou aao i le maea ai o le Saunoaga a le Palemia.

FOFOGA FETALAI: Malo malele malo saunoa i lau Afioga i le Palemia, le taitai o lo tatou Malo. O lea foi ua faafofoga vaotutui le paia o le Maota, o lea ua e faamanuia foi i o tatou sui ua pale mai, aua foi le auunaga i le atunuu, e ala i le tofi faipule o le Palemene. O lea foi ua e faamanuia i le Maota, aemaise foi le tatou alo atu i aso fiafia, le Kirisimasi ma le tausaga fou, faafetaia foi galuega o lenei tausaga. Malo faafetai.

Ia o le avanoa lenei i lau Afioga i le Taitai o le Itu Agai. O oe foi o le tama matua o le Maota, e manaomia foi sau saunoaga faamafanafana i lenei aso, aemaise foi o uso ua autovaa mai. E talitonu foi ua mafatotoga feau o le Talalelei i lenei aso. E talitonu foi, o le a faamoemoe atu i lau Afioga i le tama matua o le Maota, lau Afioga i le Taitai o le Itu Agai, ina ia faalaeiau atili lo tatou aso.

Susuga Hon TUILAEPa Dr. SAILELE MALIELEGAOI: Ou te manatu lau Afioga i le Fofoga Fetalai, o le saunoaga a le Afioga i le Palemia, o le saunoaga lava lea a le Maota nei.

E momoli ai le faamalo e le gata i lau Afioga ae faapea foi le Maota, ae faapena foi i le tapuaiga a Samoa. E amata atu i Le Ao Mamalu o le Malo, o le Sui o le Fono o Sui Tofia, faapea foi le Tafatolu fefaatauagai. O le tapuaiga a Aiga ma a latou Tama, o Tama foi ma Aiga, Tumua ma Pule, Itua ma Alataua, Aiga i le Tai ma le Vaa o Fonoti. E faapea foi le faanonogamanu a le aufaigaluega paia a le Atua.

E tainane foi le tapuaiga a tatou uso i Amerika Samoa, i le Kovana Sili ma lana Kapeneta ma le Malo. O mamalu e faasino i le Faleagafulu, le Nofo a Maopu faapea foi Faatuilemotu, le Tootoo o le Faleula ma upu i le Manuatele. O paia ia o Samoa i Sasae ma Samoa i Sisifo, o tatou lava e tasi.

O lea ua faaiu le tatou Fonotaga, maea foi le saunoaga faamanuia a le Palemia, tatou te auai faatasi. Ae o le itu sa ou fia tulai atu ai, ia faatea ese vaega ia ae tatou te le i oo mai i upu faaiu.

O se faamalo faapitoa a lenei foi Vaega aemaise au nei o le Taitai o le Itu o lo o agaia le Malo, i tatou sui usufono ua pale mai i Faiga Palota Laiti na mavae atu nei. Ae pau lava lea o le manatu, e faigata tele ia te au ona le faaleoina. Maumau e pe a na tafa lou finagalo ae faatauto uma a tatou sui usufono, lea ua le faatautoina Sui Tamaitai e toalua (2) o le Vaega nei, e atoia i ai le 10% e pei ona pasia i totonu o le Maota lenei. E pau lava lea o le agaga sa ou manatu ou te faaleoina, tatou te fiafia faatasi uma ai, ae tatou te le i agai atu i le faamamaluina o le aso fanau o le tatou Alii Faaola. Sa i ai lava le manatu, e magalo uma i i nisi mea o manatu i ai lau Afioga. O taimi e faamafolafola ai mea patupatu ma mea vanuvanu, ae tatou agai atu tatou te fiafia faatasi i le soifua mai o lo tatou Alii Faaola.

Ae o lea foi ua ou matau ua uma ona fola i malae lou finagalo. Ia, e leai se matou upu leaga o le pule atoa lena ua i le Nofoa. Ae talu ai o le faataua o aia tatau a tina, ua le mafai lava ona matou le tapaina se finagalo o le faamasinoga. E leaga na tupu muamua le mataupu lenei, na teena ai le faatautoina o matou, ia o lea foi ua toe tupu. E pau lava lena o si vaega sa ou manatu ai, o mea ua tutupu, faatea, ae agai i luma le tatou galuega. Aua o le a ea le aoga tatou te tautau ai le suafa Paia o le Atua i totonu o le Maota lenei, ae faapea ona tatou faia ia mea? Aemaise o lo o manino le Faavae. Ua uma foi ona tuu i ai aao o le Ao Mamalu o le Malo, a o lea foi ua teena le finagalo o le Ao Mamalu o le Malo. E pau lava lea.

Susuga Hon Laauli Leuatea Polataivao (Gagaifomauga Nu 3): Lau Afioga i le Fofoga Fetalai...

FOFOGA FETALAI: O lea ua maua le finagalo o le Taitai o le Itu Agai.

Susuga Hon TUILAEPa Dr. SAILELE MALIELEGAOI: Ua talia le tulaga ua i ai lau faaiuga. Ua ou talia. Ae tatou alo pea i faamasinoga. Ae o le agaga atoa. Ia manuia tele le Kirisimasi ma le Tausaga fou. Ia tatou alofaiva i le samiina o le fanau mai o lo tatou Alii. Soifua ma ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga a le Taitai o le Itu Agai.

FOFOGA FETALAI: Malo faafetai. Malo lava le saunoa faa-toeaina, ma aumai ai foi nisi fuafuaga. Ia aua tatou te atumatagi, o lo o soifua le Atua. O

le mea lea, o lena foi ua outou saili i se isi tulaga, e talafeagai mea uma o mea ua tapena e le Atua. E pau lava le mea, ia o tatou maua pea le mafanafana o le alofa o le Alii ma tatou maua le fealofani, ma faatonufofau a tatou galuega ua faaiuina i lenei tausaga. O le mea lea, ia tatou tuu i le Atua lou finagalo ua tuuina mai. Ia manuia tele la tatou fonotaga.

Ae le i taumafai atu se upu a le Nofoa, e muamua ona ou faasilasila atu, o le a usuia le uluai Fonotaga a le Komiti o Tupe Maua ma Tupe Totogi i le aso Tofi, 16 Tesema 2021 i le itula e 10:00 i le taeao. O lea fonotaga, o le a sailia ai sa outou Taitaifono, ma se Sui Taitaifono o la outou Komiti. O le a faataunuuna la outou fonotaga, i le potu fono Nu 1, o Komiti Faa-Palemene i le Maota o Tofilau Eti Alesana.

O lea e tau ina ou fono faapipii i le saunoaga ua taoto a le Afioga i le Palemia. O lea foi ua saunoa le Taitai o le Itu Agai, o lea ua pale i le tofi le tapagai'a nai le gataifale o le uluai Tumua, ina ua to i tua le asaga nai le Vaitaia, fai mai na tali lumafale i Fonoa. Ua tau manuia le alofaiva o le Palemene, pe a toe tomanatu i le folauga o lenei tausaga. Ua moni ai Afioga a le Atua, "e tasi lava le mea tatou te ofo ai, ua na o mea ua faia e le Atua mo i tatou." O le viiga foi lea tatou te faafoi pea i le Atua, o lo o faavae ai Samoa, ona o Lona alofa ma Lona agalelei sa fai ma auupega, sa o tatou tagoau i ai i taimi o le pogisa ma le le mautonu.

E momoli atu le faafetai a le Nofoa i le paia maualuga o le Palemene, i le afio o lau Afioga i le Palemia, lau Afioga i le Sao Faapito, afio lau Afioga i le Sui Palemia. Afifio Minisita o le Kapeneta faapea a outou Afioga i Minisita Lagolago.

Le paia o lea Itu o le Maota, le afio o lau Afioga i le Taitai o le Itu Agai, afio lau Afioga i le Sui Taitai ma le mamalu o sui usufono o le Palemene. Ua faamalo le taupati, faamalo le onosai ma le faapalepale, faamalo le folau, faamalo le faatoatoa.

O upu e masani ai le atunuu, e le asa se faiva ma se maumau. Afai ua i ai se aleu ma se sese o le Nofoa i lo tatou va, ou te faamalulu atu. E potu lava le tautai ae sese lana atu i ama. Faamagalo se sese ma se faaletonu o le Nofoa. Ua o tatou i ai i le vaitau o le loto faafetai ma le loto fefaamagaloai e mafai ai mea uma i la outou tofa faale-Atua.

Le tapuaiga a Samoa, le afio o lau Afioga i Le Ao Mamalu o le Malo ma lau Masiifo, Sui o le Fono a Sui Tofia ma lou Faletua, Faamasino Sili ma le mamalu o le Faamasinoga. Le tapuaiga i Faauluuluga o Ekalesia Kerisiano uma i Samoa faapea le afaigaluega faauuina o le Talalelei. O paia faaleaganuu, aua Aiga ma a latou Tama, o Tama foi ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. Ae tainane le tapuaiga mau a nai o tatou uso i le motu i Sasae i ona tulaga faalagia. Ua faamalo tatalo, faafetai tapuai a o alofaiva lau Palemene i lenei tausaga. Ua manuia faiva o le Maota ona o a outou talosaga molia, malo

faafetai. Afai ua i ai se sese o lau Palemene, ia e matou te matua atu i lau tofa faale-Atua, e ui magalo ai so matou faaletonu.

Le Tapuaiga a Faauluuluga o Matagaluega faamalo, faafetai tautua Malo, faamalo finafinau i mea sili mo le tautuaina o lau Palemene. O le aufaigaluega a le Palemene, ua faamalo tautua, faafetai le onosai i lo outou valaauina. Ua matagofie mea uma e ala i tapenaga mo le faagasologa o taualumaga uma o lau Palemene, faafetai tautua Palemene.

Mo Matagaluega ma Faalapotopotoga uma o lo o tautuaina le Palemene i ana tauaofiaga, Matagaluega o Leoleo, le Tineimu, le Soifua Maloloina, le 2AP, ma so o se auaunaga sa fitaitigā i le tautuaina o le Palemene, faafetai ma ua faamalo le tautua.

E momoli foi le faafetai faapitoa i lau Afioga i le Sui Fofoga Fetalai, mo le lagolagosua i le faatinoga o la ta galuega fai faatasi. Malo le onosai, faafetai le manatu i le Palemene ma lona mamalu.

Ua o tatou i ai i le tau faaiuiu o galuega o lenei tausaga, o moomooga alofa o le Nofoa ma faamanuiaga i le alo atu i le faafeiloai atu o le pepe o le Kerisimasi, alofagia e le Atua ia outou tau fai maua se Kerisimasi fiafia ma se Tausaga Fou manuia. Soifua.

Le mamalu e o le Palemene, ua tapena e le tatou Ofisa le taumafataga mo le Palemene e taualuga ai galuega o lenei tausaga aemaise o le alo atu mo faigamalologa mo le Kerisimasi ma le Tausaga Fou.

Ae tatou te le i tolopo, ou te talosaga atu i lau Afioga i le Sui Fofoga Fetalai e te saunia se tatou tatalo, e faaiu ai le tatou Fono.

Na tolopo Taualumaga a le Fono Aoaofaitulafono i le itula e 10:47 i le taeao seia aulia le itula e 9:30 i le taeao o le Aso Lua, 18 Ianuari 2022.